



*Noé fait sacrifice à Dieu, qui luy promet Alliance & benediction par le signe celeste.*

**D**E Patriarche Noé avec toute sa famille, estant hors de l'Arche, comme aussi tous les animaux qui y auoient esté preseruez, voulant reconnoistre ce benefice, edifia vn Autel au Seigneur, & prit de toute beste nette, & volatile nette. Si offrit holocauste au Seigneur sur l'Autel, lequel sentant l'odeur & suauité, dit en son cœur, Je ne maudiray plus doresnauant la terre, pour l'occasion de l'homme : Mais tant que la terre sera, les semailles, & les moissons, & les saisons d'Hyuer & d'Esté, le iour & la nuit ne cesseront point. Dieu donc benist Noé, & ses fils, & leur dist, Fructifiez sur la terre, la crainte & treueur de vous sera sur tous animaux terrestres, celestes : & aquatiques, lesquels vous sont baillez entre les mains, & tout ce qui a vie vous sera pour viande. Pour assurance de ce, Dieu dist, quand i'auray couuert de nuées la terre, l'arc apparostrà és nuées, Si seray lors memoratif de mon alliance, qui est entre moy & vous, & entre toutes ames qui viuent, & les eaux ne seront plus en deluge, pour exterminer toute chair humaine.

*Genese 8. & 9. Chap.*